



-Suli tunniussassaqaqanga

Nikolaj Svendsen Kiffartuussivimmi suleqatigaarput utoqqaanersaralugulu.



Nikkulaat immikkoortortaqarfimmini.

Qiimasoq ilakkuminartorlu. Nikkulaat inuttut eqqaaneqassaguni oqaatsit taakku tullursinnaapput. Nikkulaammi inuuvoq illarumatoq suliffimminullu tunniusimalluinnarluni sulisoq.

- Kajumissusera alliartuinnarpoq. Taamatut oqarsinnaavunga. Suliffik nuannersoq, suliat nuannersut suleqatillu nuannersut. Minnerunngitsumillu sulisitsisumiit tatigineqarneq misigisarlugu, taanna kajumissutsimut aamma iluaaqataalluinnarpoq, Nikkulaat aallartippoq.

Nikkulaat maajimi 68-inik ukioqalissaaq. Kangersuatsiami inuuvoq, nuliaqarpoq arfinilinnillu qitornaqarluni. Nikkulaat ukiut 53-it KNI-mi (KGH-milu) sulereersimalerpoq. Ukiorpasuit.

- 14-inik ukioqarlunga Kangersuatsimi pisiniartitsisutut aallartippunga, taamani KGH-p nalaaniuvoq. Taamanikkut pissutsit imaapput, atuarfimmi pikkorissut Danmarkimut atuariartortinneqartarput, u-ngalu innersuunneqarsimallunga. Qujanartumilli aallartitaanikuunngilanga, ataatama piniartussatut isumalluutigimmanga, Nikkulaat nangilluni oqaluttuarpoq.



Nikkulaap qujanartumik oqarnera imatut paasisassaavoq, pisiniarfimmiiginnarnini pequtugalugu ukiut ingerlanerini niuertorutsit ilinniagaqalerami.

- Imaallaat ullumi maani sulivunga, Nikkulaat qungujulaarluni oqarpoq.



Nikkulaat sulisoq.

Misilittakkat arlallit

Nikkulaat Kangersuatsiami pisiniarfimmi sulilluni ilinniarnissamut pilerisukkiartuinnarsimavoq. Upernavimmi niuertumut allagaqaasiorpoq, niuertorutsit ilinniagaqarusulluni.

- Qujanartumik qinnuteqaatiga tigulluarneqarpoq, 1972-imi Tasiusamut ilinniariarlunga nuuppugut, qaammatit arfineq pingasut Tasiusamiissalluta.

Nikkulaat taamanikkut nuliaqalereerpoq qitornaqalereerlunilu. Tasiusamili inigisaat nutaanggissimavoq nillertarlunilu, najugarissallugu nukangasunik meeraqarluni tulluarnani. Ilaqutariit allamik inissaqannginnamik Nikkulaat allagaqaqqippoq ajornangippat ilinniakkani nangillugu allamut nuusinnaanerluni. Ajornangippallu sumiiffimmut aalisakkerivilimmut.

- Imatut tungavilerpara niuertorutsit misigisassat tamaasa milikkusukkakit, aalisakkerivilimmikkaannilu niuertorutsit sulineq aamma allaasimassammat, Nikkulaat oqarpoq.



Nikkulaakkut 1973-imi Alluitsup Paanut nuupput, ukiorlu ataaseq qaangiummat Kullorsuarmut nuullutik, Nikkulaap niuertorutsimut ilinniarnini tassani nangikkamiuk, 1976-imilu Kullorsuarmi niuertorutsit atorfimilluni.

- Ukiut marluk Kullorsuarmi niuertorusioreerlunga Kangersuatsiami niuertorusinngorpunga. Taasuma kingorna handelsassistentitut taamani taasagaattut Upernavimmi aamma sulinikuvuunga, Nikkulaat oqarpoq.

Nikkulaat ukiut 31-it niuertutut niuertorutsitullu sulisimavoq. KGH-llu nalaani allangortiterinerit pilermata atorfim arlallit atorunnaarsinneqarput. 2009-mi Nikkulaat Upernavimmi tuniniaanermi pisortatut atorfittaarpoq, ukiullu marluk taanna atorfingereerlugu ilaqutariit 2011-mi Kullorsuarmut nuupput, tassanilu qaammatini arfineq pingasuni sulereerluni 2012-imi Sisimiunut nuullutik.



Nikkulaat Nasaasaap qaavani.

Suliffik tulluusimaarnartoq

Ukiok 2014 Nikkulaat Kiffartuussivitsinni nioqqutissanik nakkutilliusutut (varecontrolleritut) sulilerpoq ulloq mannaluk atorfimiluguk.

- Ullaat tamaasa sulinissannut pilerisullungak itertarpunga. Sulininni misilittagaqarpasuaqarpungak atorluarsinnaasannik. Soorunami nuannersut nuanniitsullu ukiut ingerlanerini misiginikuuakka, taamasali qujaruppakka misigisat tamarmik arlaatigut tunisisarmata, Nikkulaat oqarpoq.

KGH-p ataani pisortat kalaalingoriartuaarnerat Nikkulaap aamma qanimut malugilluarnikuuai.



- Allanngoriartorneq taanna iluaqutaanikooqaaq, pisortat sulisut naliginerulerlugit sulilermata, oqarpoq.

Nikkulaat piniartussatut perorsagaagaluarluni allamut ingerlanikuunini qujamasuutigisarpaa, taamaattorli piniarneq iperarnikuunngilaa.

- Pinalunneq nuannarisorujussuuaara ingammillu nunaqarfinni najugaqarallaratta sunngiffinni feerianilu aallutarilluartaqara, Sisimiunut nuukkatta timinnik aalatitsinerulerulernikuuvunga, pisuttuarneq, qaqqasiorneq, arpannerlu aallunnerulerlugit, sunngiffinni soqutigisakka assigiinngitsorpassuusarput, soorlu atuakkanik atuarneq, internikkut paasisassarsiorneq, kiisalu nipilersukkanik nuannarisannik tusarnaarneq aalluttarpakka. Nikkulaat oqarpoq.

Nikkulaat sulii soraarninngornissaminut takorluugaqanngilaaq.

- KNI peroriartorfigaara, suliffigalugulu nuannareqaara tulluusimaarutigalugulu, suliffiummi inuiaqatigiinnut sunniutai annertoorujussuupput, ingerlalluarneralu aamma tulluusimarnartuuvoq. Sunali tamarmi killeqarpoq. Kissaatiginerpaavara peqqillunga sulii, suliartoqqaarnittuulli nuannaartigalunga suliffiga nuannarisara qaquguugaluarnerso q qimakkumaarlugu, Nikkulaat naggasiivoq.